

Da parte mæ invito tutti quelli che veuan da 'na man in Compagna a candidâse, ma veuggio ascì regordâ che anche i senplici sòcci, che son quelli in scî quæ a Compagna a s'areze, peuan dâse da fâ pe tegnî erto o nomme da Compagna e de Zena.

O giorno do Confeugo o l'è stæto beliscimo e gremenio de gente ch'a l'è inpîo o salon do Gran Conseggio a Paxo. A Scindico (o Duxe) a l'è riçevûo o Prescidente da Compagna (l'Abòu do pòpolo) in ciassa De Ferrari, ma pöi a l'è dovûo anâ dò-u Ministro ch'o l'ea in vixita a Zena. A l'è stæta sostitoia dò-u vice-scindico Paolo Pissarello che, sentî i mogogni, o s'è inpegnòu a trovâ de soluçoin. I discorsi do Confeugo se peuan leze ciù avanti inte questo Boletin.

Alegri!

I MOGOGNI DO PRESCIDENTE

Sciò Scindico, no pòsso incomensâ o mæ discorso senza regordâ a teribile aluvion ch'a l'è colpîo Zena a-i primmi de novembre pe esprime a ciù grande solidarietà de tutta A Compagna pe quelle personn-e ch'àn avuo lutt e danni. Ma i zeneixi, quelli che cantan "son zeneize e no ghe mòllo", àn saciùo ripartî: con l'agiuuto de tanti zoeni, se son redogîe e maneghe e àn ripigiòu a travagiâ. Segûo che òua ghe veu l'agiuuto de tutti e sorvialutto do Stato, ch'o no deve ascordâse de chi à pèrso tutto. Ma a vitta a deve anâ avanti, pe questo ghe veuggio segnalâ quarcösa che, pe chi veu ben a sta çitæ e a-a seu stöia, a no va goæi ben. Sciâ me lasce incomensâ.

Paganin: dov'o l'è nasciuo Paganin? A Zena. Eben, Zena, dõppo aveighe caciòu zu a caza, a l'è misso doê lapidî inti Giardin diti de plastica. In tenpi ciù recenti s'è parlòu de faghe 'n monumento. Capiscio che ancheu sta propòsta a gh'à di problemi dæto che palånche no ghe n'è, ma almeno se porieiva fâ in bello netezzo la dove son e doe lapidî: levâ e scrite che inciastran e miâge e daghe 'na spasâ li d'in giò.

S'è parlòu (e sta chi a l'è a tersa vòtta chò-u diggo) de rimette in pè o monumento a Raffaele De Ferrari: a cösa a l'è stæta inandiâ, pöi l'è sciortio feua quarche problema, ma no bezeugna molâ. Se anche parlòu de spostâ a Pòrta Pilla pe dâghe ciù respîo: sciben che i costi son a càrego de chi fa o travaggio, gh'è quarche problema co-a burocraçia, ma niatri zeneixi confiemmo che Vosciâ sciâ voriâ no molâ manco inte sto caxo chi e dimostrâ che anche senza palånche quarcösa se peu fâ pe dâ 'n scrolon a-a burocraçia.

'N'atra cösa che gh'emmo into cheu a l'è de poei vedde Zena bella, netta, ordinâ. Aloa perchê no incomensâ dò-u

verde publico? I giardinetti, e penso ascì a quelli che fan da spartitrafego, de spesso son pròpio abandonæ e invece de ese 'na macchia de verde e de fiori son pin de rumenta, con drento in pò de tutto: cicche, papê, botigette e sachetti de plastica. E za che ghe son veuggio regordâ che anche i scæn chi davanti a Paxo da-a parte de De Ferrari no son goæi in ordine e senpre pin de zoenotämme ch'o sta li, a tòrsio, a brutâ e scâe e a rende in percorso a òstacoli intrâ in Paxo.

Ben, anche con ste cöse chi ch'o dito se da 'n segnale che Zena a veu torna tiâ sciù a testa e tornâ ciù bella de primma. E magari Vosciâ, da donna, a saiâ bonn-a a dâ quell'inpronta de femminilitæ ch'a no goasta mai, ansi ch'a fa e cöse ciù belle.

Concluddo parlando da Compagna e in particolare do Tondo de Natale. L'è ciù de quarant'anni che a nostra vice prescidente Elena Pongiglione, artista aprexâ a livello internazionale (de seu opere fan parte da coleçion da Carige) e amante de Zena, a fa o Tondo de Natale, in tòcco unico, fæto apòsta pe st'òcaxon, che A Compagna a l'òfre a-o Scindico de Zena. Ma che fin àn fæto tutti sti tondi? A niatri da Compagna ne saieiva cao poeili vedde apeixi into Palaçio do Comun in regòrdo de çeimònne pasæ do Confeugo e a ònò da nòstra grande artista Elena Pongiglione. Anche in sce sta cösa chi confiemmo in Vosciâ e in sciâ seu sensibilitæ.

Mi ò finio e ghe lascio a paròlla.

Tanti ouguri e scignorîa a Vosciâ e a tutti.

Pe Zena e pe San Zorzo!



Confeugo - cerimonia del Cartulario